



**Sumáriu Kazu**  
**Tribunál Judisiál Primeira Instáncia Suai**  
**Outubru 2023**

**Afirmasaun:** Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instáncia Suai**  
**1. Totál kazu ne'ebé JSMP monitoriza : 17**

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	6
Artigu 177 KP no artigu 182 KP	Abuzu seksuál ba menór ho agravasaun	1
Artigu 178 KP	Aktu seksuál ho adolexente	1
Artigu 145 KP Artigu 258 KP	Ofensa ba integridade física simples no danu simples	1
Artigu 1757, 1758, 1759, 1762, 1765, 1786, 1782, 1804, 1805 KS	Ezersisiu podér paternál	2
Artigu 177 KP	Abuzu seksuál ba menór	2
Artigu 172 KP	Violasaun seksuál	1
Artigu 316 KP	Kontra bandu	2
Artigu 145 KP	Ofensa ba integridade física simples	1
<b>Totál</b>		<b>17</b>

## 2. Totál desizaun ne'ebé JSMP monitoriza:15

Tipu pena	Artigu	Númeru
Suspensaun ba prizaun nia ezelesaun	Artigu 68 KP	5
Pena multa	Artigu 67 KP	2
Omologa	Artigu 262 KPP	3
Absolve		2
Pena prizaun	Artigu 66 KP	1
Suspensaun ba prizaun nia ezelesaun no indemnizasaun sivíl	Artigu 68 KP	2
<b>Totál</b>		<b>15</b>

## 3. Totál kazu sira ne'ebé adia tuir JSMP nia monitorizasaun:0

## 4. Totál kazu sira ne'ebé sei kontinua prosesu tuir JSMP nia monitorizasaun : 2

### B. Deskrisaun ba sumáriu kazu ba desizaun sira.

#### 1. Krime abuzu seksuál ba menór.

Nú.Prosesu : 0003/22.MFFBL  
Kompozisaun Tribunál : Koletivu  
Juis : Dr. Naason M.A.M. Doutel, Dr. Jose Maria De Araújo no Dr. Samuel da Costa Pacheco  
Prokuradór : Dr. Nelson J.S. Magno  
Defeza : Dr. Octavio da Costa (Advogadu Privadu)  
Desizaun : Pena prizaun tinan 10

Iha 02 Outubru 2023, Tribunál Judisiál Primeira Instáncia Suai prezide leitura akordaun ba krime abuzu seksuál ba menór ne'ebé envolve arguidu AdOS hasoru lezada ho idade (13), iha Munisípiu Manufahi.

#### Akuzasaun Prokuradór

Prokurador akuza katak iha 20 Janeiro 2018, iha oras tuku 12:00 meiodia, lezada fila hosi eskola hasoru malu ho arguidu no arguidu hateten ba lezada katak "*hau gosta ó*", lezada mós doko ulun katak hakarak." Lezada kontinua ba uma troka tiha farda eskola no iha oras tuku 13:00 meiodia lezada ho nia alin sira ba kuu ai-dak no hetan arguidu iha ne'eba no distáncia husi lezada nia uma maiszumenu metro 30, arguidu bolu lezada, lezada mós besik ba arguidu no arguidu hateten tan ba lezada katak "*hau gosta ó*", lezada mós doko ulun hakarak. Lezada ho arguidu tuur konversa arguidu hateten ba lezada katak atu moris hamutuk hanesan feen ho la'en (halo relasaun seksuál), arguidu mós hahú kolu lezada nia roupa no arguidu mós hasai nia roupa hodi halo relasaun seksuál ho lezada, rezulta lezada senti moras no raan.

Tuir mai iha 21 Janeiro 2018, lezada ho arguidu kontinua hasoru malu iha fatin refere, arguidu hasai lezada nia roupa no arguidu mós hasai nia roupa hodi halo relasaun seksuál ho lezada.

Iha 30 Dezembru 2020, iha oras tuku 18:00 lokraik, lezada ho arguidu nafatin hasoru malu iha fatin refere no halo relasaun seksuál no ikus mai rezulta lezada gravida (isin rua) no partus iha 4 setembru 2021.

Prokuradór akuza arguidu kontra artigu 177 Nú. (1) KP kona-ba abuzu seksuál ba menór ho moldura penál tinan 5 too tinan 20.

### **Produsaun ba prova sira**

Iha prosesu julgamentu, arguidu deklara katak faktu balun loos no balun la loos, arguidu deklara katak halo duni relasaun seksuál primeiru ho lezada loron haluha maibé iha fulan Abril 2020, arguidu deklara katak antes kuñese lezada no halo relasaun seksuál iha 2020, iha pandemia COVID 19, arguidu husi Dili ba halimar iha Manufahi no momentu ne'eba lezada ba kioske mak arguidu haree no husu lezada atu iha relasaun namoru no lezada mós simu arguidu hanesan namoru, arguidu deklara liután katak liu tiha semana rua resin mak hasoru malu no halo relasaun seksuál primeiru ne'e iha ailaran no halo relasaun seksuál semana ida too dala rua. Arguidu deklara katak bainhira lezada isin rua família rua tuur hamutuk no arguidu ho lezada konsege moris hamutuk hanesan feen ho la'en, depoisde ne'e arguidu fila ba Dili kontinua nia eskola no momentu lezada atu partus arguidu mai fali no depoisde partus arguidu atu fila ba Dili, maibé lezada nia maun sira baku arguidu nune'e too agora dook malu ho lezada ho nia oan. Arguidu mós deklara katak namoru ho lezada ne'e lezada nia tinan 16 tanba lezada nia loron moris iha 13 Marsu 2004.

Alende ne'e, lezada kontinua konfirma faktu sira iha akuzasaun no deklara katak iha 2018, ne'e arguidu la eskola no halimar iha same de'it no iha 2020, mak arguidu fila ba eskola, lezada deklara katak momentu ne'eba arguidu nia tiu ho nia inan aman hatete ba lezada nia aman katak arguidu lakohi ona lezada nune'e lezada ho nia aman apresentada keixa hasoru arguidu.

### **Alegasaun finál**

Prokuradór haktuir katak, iha julgamentu ne'e arguidu koko atu nega faktu balu no deklara katak halo duni relasaun seksuál ho lezada, maibé iha tinan 2020, Prokuradór entende katak arguidu tenta atu hases aan husi krime ne'ebé akuza ba arguidu maibé lezada kontinua konfirma totál ba faktu iha akuzasaun, tanba ne'e husu ba tribunál atu aplika pena ba iha arguidu.

Entretantu defeza hatuir katak, arguidu nia deklara katak loos duni halo duni relasaun seksuál ho lezada tanba iha relasaun namoru no iha momentu ne'ebá arguidu ho lezada halo relasaun seksuál iha 2020, no iha momentu ne'ebá lezada atinji ona tinan 16, defeza hare'e katak krime ne'ebe inputa ba arguidu ne'e la priense elementu krime abuzu seksuál ba menór, tanba ne'e husu ba tribunál atu absolve arguidu husi krime ne'e.

### **Desizaun**

Depoisde avalia faktu sira hotu, tribunál prova katak arguidu komete duni krime abuzu seksuál ba menór hasoru lezada, maske iha julgamentu ne'e arguidu hatete katak halo relasaun seksuál ne'e lezada atinji ona idade tinan 16. Nune'e tribunál fiar liu lezada nia deklarasaun katak momentu akontesimentu ne'e lezada idade tinan 13. Bazeia ba faktu provadu hirak ne'e no tetu mós ho sirkunstánsia hot-hotu ne'ebé haleu krime, tribunál konklui prosesu ne'e no kondena arguidu ho pena prizaun tinan sanulu.

## **2. Krime abuzu seksuál ba menór**

Nú. Prosesu : 0087/21.SVSUI  
Kompozisaun Tribunál : Koletivu  
Juis : Dr. Naason M.A.M. Doutel. Dr. Hugo da Cruz Pui. Dr. Samuel Pacheco  
Prokuradór : Dr. Rafael Jeronimo Gusmão  
Defeza : Dr. Albano Maia (Advogadu Privadu)  
Desizaun : Absolve

Iha 04 Outubru 2023, Tribunál Judisiál Primeira Instánsia Suai prezide julgamentu leitura akordaun ba krime abuzu seksuál ba menór ne'ebé envolve arguidu NJBL hasoru lezada ho idade (13), iha Munisípiu Covalima.

### **Akuzasaun Prokuradór**

Prokuradór akuza katak, iha 22 Novembru 2021, iha oras tuku 20:00 kalan, lezada ho nia kolega estuda hela iha lezada nia uma, arguidu telfone atu hasoru lezada no lezada mós hasoru arguidu iha lezada nia uma sorin, arguidu konversa ho lezada no tula lezada ho motorizada ba iha etrada arguidu ho lezada hahú rein malu, hafoin rein malu arguidu ho lezada atu fila ba uma, lezada nia bin haree hetan lezada ho arguidu no duni tuir arguidu ho lezada no arguidu hatun tiha lezada no kalan ne'e lezada la toba iha uma dadeer mak foin tama uma.

Prokuradór akuza arguidu kontra artigu 177 Nú. (2) KP. kona-ba abuzu seksuál ba menór ho moldura penal tinan 5 too tinan 15.

### **Produsaun ba prova sira**

Iha prosesu julgamentu, arguidu konfesa faktu iha akuzasaun katak momentu ne'e rein lezada nia reen-toos tanba lezada ho arguidu iha relasaun namoru, arguidu mós deklara katak la kaer lezada ninia orgaun seksuál sira seluk.

Alende ne'e, lezada kontinua konfirma faktu hotu iha akuzasaun no haktuir katak momentu ne'eba arguidu *la kaer hau nia orgaun seksuál sira*, maibé rein reen-toos de'it.

### **Alegasaun finál**

Prokuradór haktuir katak, iha julgamentune'e arguidu konfesa no konfirma husi lezada no iha perante julgamentu ne'e la iha faktu foun, tanba ne'e husu ba tribunál atu aplika pena labele todan liu arguidu nia kulpa.

Entretantu defeza hatuir katak, arguidu nia deklarasaun sira ne'e loos duni katak arguidu rein lezada nia reen-toos no arguidu la kaer lezada nia orgaun sensitivu, nune'e mós reforsa husi lezada katak rein reen-toos de'it no la kaer orgaun sensitivu sira, defeza haree katak arguidu nia aktu ne'e la priense elementu krime nune'e husu ba tribunál atu absolve arguidu husi krime ne'e.

### **Dezisaun**

Depoisde avalia faktu hotu, tribunál konsidera faktu iha akuzasaun ne'e la priense elementu krime no iha julgamentu ne'e la iha provas foun ne'ebé suficiente atu kondena arguidu, nune'e tribunál konklui prosesu ne'e no absolve arguidu husi krime ne'e.

### **3. Kazu sivíl regulasaun ezersísiu poder paternál**

Nú.Prosesu : 0037/23.CVTDS  
Kompozisaun Tribunál : Singulár  
Juis : Dr. Ivan José Suritay Patrocínio Antonino  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Omologa pedidu dezisténsia keixa

Iha 05 Outubru 2023, Tribunál Judisiál Primeira Instánsia Suai prezide tentativa konsiliaunba kazu regulasaun exersísiu podér paternál ne'ebé envolve menór ACIdA tinan (2) hasoru rekeridu ApdA no FIN akontese, iha Munisípiu Manufahe.

### **Termu fundamental**

Loron la apura, maibé iha fulan Maiu 2022, rekeridu sai husi uma fila ba ninia inan aman no la fila ba uma hodi la fó alimetasaun ba ninia oan, nune'e prokuradór hatama asaun ida ne'e hodi rekeridu aman atu tau matan ba menór ninia nesesidade lor-loron nian.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 Kódigu Sivíl (KS), kona-ba responsabilidade inan-aman ba menór sira.

### **Tentativa konsiliaun**

Iha tentativa konsiliaun ne'e rekerida ne'ebé hanesan inan hatete katak menór dadaun ne'e hela ho rekerida, rekeridu ne'ebé hanesan aman konkorda atu menór nafatin hela ho rekerida, kona-ba rejime vizita nian ne'e rekeridu konkorda kada semana vizita menór dala rua no iha loron Sabadu lori menór ba ninia uma no Domingo lokraik lori fali menór ba iha rekerida. Regime alimentasaun rekeridu konkorda kada fulan fó alimentasaun ba menór US\$50.00 no entrega direita ba menór hahú husi fulan Novembru 2023.

### **Alegasaun finál**

Prokuradór reprezenta menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

### **Desizaun**

Bazeia ba parte rua nia akordu kona-ba regime alimentasaun, hela fatin no vizita nian, tribunál konklui prosesu ne'e no omologa akordu ne'e.

#### **4. Krime ofensa ba integridade fízika simples no danu simples**

Nú.Prosesu : 0020/23.PDSUA  
KompozisaunTribunál : Singulár  
Juis : Dr. Hugo da Cruz Pui  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Omologa pedidu dezisténsia keixa

Iha 10 Outubru 2023, Tribunál Judisiál Primeira Instáncia Suai prezide julgamentu tentativa konsiliaisaun ba krime ofensa ba integridade fízika simples no danu simples ne'ebé envolve arguidu Sirildo Gusmão hasoru lezadu José Amaral no Clementino Amaral, iha Munisípiu Covalima.

#### **Akuzasaun Prokuradór**

Prokuradór akuza katak iha 28 Janeiru 2023, iha oras tuku 15:30 lokraik, arguidu Serildo Gusmão ho kondisaun lanu, kaer katana ida iha liman, ba fatin ne'ebé lezadu sira halibur ba hodi tein tua sabu, bainhira arguidu to'o iha fatain refere arguidu dehan ba lezadu sira katak "*problema*", nune'e lezadu sira husu arguidu atu rezolve problema tuir família no haruka arguidu rai tiha katana no arguidu soe tiha katana no foti fali mangeira rohan hodi baku dala ida iha lezadu Jose Amaral nia kotuk laran no baku dala ida iha lezadu Clementino nia ain-kabun no lezadu nain rua halai tiha arguidu kontinua fakar lezadu sira nia tua sabu hamutuk jerigen neen no tua ulun jerigen tolu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan too 3 ka multa no artigu 258 KP kona-ba danu simples ho moldura penál tinan 3 ka multa.

#### **Produsaun ba prova sira**

Bazeia ba artigu 262 Nú(2) KPP kona-ba tentativa ba konsiliaisaun, nune'e antes tama ba julgamentu produsaun ba prova sira, juis husu atu halo tentativa konsiliaisaun antes tama ba julgamentu.

Iha prosesu tentativa konsiliaisaun ne'e, parte sira hakarak dame malu sein kondisaun ruma tanba antes ne'e sira diak malu ona.

#### **Alegasaun finál**

Prokuradór no defeza apresia akordu dame ne'ebé parte rua konkorda hamutuk ona no husu ba tribunál atu omologa akordu dame ne'e.

#### **Dezisaun**

Bazeia ba akordu dame husi parte rua no pedidu dezisténsia keixa husi lezadu, tribunál konklui prosesu ne'e hodi omologa akordu dame ne'e no absolve arguidu husi krime ne'e.

#### **5. Krime violasaun seksuál**

Nú. Prosesu : 0020/22.PDSUA  
Kompozisaun Tribunál : Koletivu  
Juis : Dr. Hugo dacruz Pui. Dr. Naason M.A.M. Doutel no Dr. Samuel da Costa Pacheco  
Prokuradór : Dr. Pascasio de Rosa  
Defeza : Dr. Jonas Henrique  
Desizaun : Absolve

Iha 11 Outubru 2023, Tribunál Judisiál Primeira Instánsia Suai prezide leitura akordaun ba krime violasaun seksuál ne'ebé envolve arguidu AA hasoru lezada, iha Munisípiu Bobonaro.

### **Akuzasaun Prokuradór**

Prokuradór akuza katak iha 10 Novembru 2021, iha oras tuku 18:00 lokraik, arguidu konta ba benkel nain katak bainhira testemuña ne'ebé hanesan mós lezada nia katuas oan sai husi uma ba buka osan iha liur, arguidu ba halo relasaun seksuál ho lezada no bainhira testemuña lori motor ba iha benkel no benkel na'in informa ba testemuña katak banhira *"ó sai ba buka osan arguidu ba iha ó nia uma hodi halo relasaun seksuál ho ó nia feen"* hafoin testemuña rona ida ne'e fila ba ninia uma husu ba nia feen katak arguidu konta aat loos *"ó iha benkel na'in, di'ak liu ó fila ba ó nia inan aman duke hau baku ó"*, lezada mós sente tauk no sai husi uma ho labarik nain tolu ba ninia inan aman.

Antes ne'e iha 10 Maiu 2017, iha oras tuku 1:32 madrugada, lezada ho nia oan mesak toba iha uma laran no lezada nia katuas oan sai tiha, lezada ho nia oan toba dukur no lezada toba fila haree hetan arguidu hamrik hela iha lezada nia kama oin no lezada hader atu hakilar maibé arguidu buti metin lezada niaibun no foti tudik se ba lezada nia kakorok hafoin ne'e lezada tauk no arguidu haruka lezada tun husi kama leten ba iha rai no arguidu husik tiha lezada niaibun hafoin arguidu kontinua hasai lezada nia rounpa no dudu lezada ba fali kama leten no arguidu nafatin se tudik ba lezada nia kakorok no arguidu kolu nia rounpa no halo relasaun seksuál ho lezada, depoisde halo tiha relasaun seksuál ho lezada arguid dehan ba lezada katak *"labele fó hatene ó nia katuas oan, bainhira ó fó hatene ó nia katuas oan hau sei oho mate ó"*. Hafoin liu tiha loron rua lezada fó hatene ba xefe aldeia no xefe aldeia kontaktu Polísia mai lori arguidu ba iha edifidiu polísia nian.

Prokuradór akuza arguidu kontra artigu 172 KP kona-ba violasaun seksuál ho moldura penál tinan 5 too tinan 15.

### **Produsaun ba prova sira**

Iha prosesu julgamentu arguidu konfesa parsial ba faktu sira iha akuzasaun katak momentu akontesimentu kalan boot lezada mak telefone ba arguidu no husu arguidu atu ba lezada nia uma, maibé arguidu dehan ba lezada *"ó foti nomor telefone iha ne'ebé"*, lezada dehan foti iha ninia katuas oan nia telefone, hafoin arguidu dehan ba lezada katak *"ó nia laen ne'e hau nia apa ki'ik"*, maibé lezada nafatin dehan katak *"ó ne'e tauk teen loos ó ne'e mane LGTBI karik"*, no lezada kontinua husu arguidu atu ba lezada nia uma, lezada mesak iha uma nune'e arguidu ba lezada nia uma no banhira arguidu to'o iha lezada nia uma lezada loke odamatan no arguidu tama ba uma laran lezada dada arguidu nia liman no lezada dehan ba arguidu katak ita rua toba hamutuk

halo relasaun seksuál, arguidu seidak hatan lezada hasai arguidu nia roupa no lezada hasai nia roupa ho arguidu ho lezada halo relasaun seksuál. Arguidu mós deklarata katak relasaun seksuál ne'e akontese iha 24 Dezembru 2017, laos iha 10 Maiu 2017.

Alende ne'e, lezada kontinua konfirma faktu sira iha akuzasaun, lezada deklarata katak momentu ne'e la telefone ba arguidu tanba la iha telefone no nunka obriga arguidu atu ba uma, lezada deklarata liután katak trauma ho arguidu ninia hahalok.

Testemuña nu'udar lezada nia la'en depoimenta katak rona husi Sr. CBB katak arguidu ho lezada halo relasaun seksuál tanba ne'e testemuña ba husu lezada hanesan feen no hirus lezada atu lezada sai husi uma, testemuña deklarata tan katak arguidu halo hahalok ida ne'e hasoru lezada maibé lezada nunka fó hatene no banhira hetan informasaun husi Sr. CBB mak foin hatene lezada ho arguidu nia hahalok, testemuña deklarata liután katak momentu ne'eba atu rezolve tuir família maibé la konsege tanba arguidu lakohi fó sala ba lezada.

### **Alegasaun finál**

Prokuradór haktuir katak iha julgamentu arguidu deklarata katak halo relasaun seksuál ne'e tanba lezada mak obriga arguidu ba uma no halo relasaun seksuál maibé rona husi lezada kontinua konfirma faktu iha akuzasaun. Prokuradór haree katak arguidu nia aktu ne'e prinese elementu krime tanba ne'e husu ba tribunál atu kondena arguidu ho pena prizaun tinan ualu.

Entretantu defeza haktuir katak perante julgamentu arguidu deklarata katak halo relasaun seksuál ne'e tanba obriga husi lezada no arguidu ho lezada halo duni relasaun seksuál, lezada hanesan ofendidu maibé bainhira arguidu halo relasaun seksuál ho lezada no arguidu fila ba uma lezada la fó hatene ba nia la'en ka ba kesar iha autoridade sira, maibé arguidu ba konta ba Sr. CBB mak foin nia la'en hatene no bolu atu rezolve tuir família maibé arguidu lakohi fó sala ba lezada. Defeza haree katak arguidu ninia hahalok ne'e la priense elementu krime tanba ne'e husu ba tribunál atu absolve arguidu husi krime ne'e.

### **Desizaun**

Depoisde avalia faktu sira hotu, iha julgamentu arguidu ho lezada ida-idak mantein sira nia deklarasaun, arguidu halo relasaun seksuál ho lezada maibé lezada nunka fó hatene ba nia família hanesan ninia la'en no la kesar, maibé lezada nia la'en rona fali husi ema seluk, bazeia ba faktu sira ne'ebé produs iha julgamentu tribunál duvida nune'e absolve arguidu husi krime ne'e.

## **6. Krime ofensa ba integridade física simples ho natureza violéncia doméstika**

Nú.Prosesu	: 0040/22.ANANV
KompozisaunTribunál	: Singulár
Juis	: Dr. Hugo da Cruz Pui
Prokuradór	: Dr. Rafael Jeronimo Gusmão
Defeza	: Dr. Domingos dos Santos



Desizaun

: Pena prizaun fulan 3 suspende ba tinan 1

Iha 11 Outubru 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FC hasoru nia feen, Munisípiu Ainaro.

### **Akuzasaun Prokuradór**

Prokuradór akuza katak Iha 27 Setembru 2022, iha oras tuku 11:00 dadeer, arguidu foti au-pedasuk baku dala ida iha lezada nia kelen, baku dala ida iha kotuk laran, dala ida kabaas no baku dala iha iha liman fuan parte loos no kontinua tebe dala ida iha lezada nia kabaas rezulta lezada monu tun ba rai. Antes ne'e arguidu ho lezada diskuti malu kona-ba lezada duni sai sira nia feto foun ho nia oan, nune'e arguidu nerbozu komete aktu refere hasoru lezada.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál too tinan 3 ka multa konjuga ho artigu 2,3(a), 35 (b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarasaun katak baku feen ne'e ladi'ak no promete iha futuru sei la repete ninia hahalok ne'e hasoru lezada no ema seluk, foin mak mai hatan iha tribunál no arrepende ona ninia hahalok.

Tribunál presinde lezada nia deklarasaun tanba arguidu konfesa faktu hotu iha akuzasaun.

### **Alegasaun finál**

Prokuradór haktuir katak, arguidu konfesa, mezmua sira di'ak malu ona maibé atu prevene krime violénsia doméstika ne'ebé a'as tebes, husu ba tribunál atu kondena arguidu ho pena prizaun fulan neen suspende ba tinan ida.

Enkuantu defeza haktuir katak arguidu konfesa, arrepende nia hahalok no depoizde akontesimentu ne'e arguidu la halo tan krime hasoru lezada, alende ne'e arguidu mós iha ekonomia suficiente, tanba ne'e husu ba tribunál atu kondena arguidu ho pena multa.

### **Desizaun**

Depoizde avalia faktu sira hotu, tribunál prova katak arguidu foti au-pedasuk baku dala ida iha lezada nia kelen, dala ida kotuk laran, dala ida kabaas no baku dala iha lezada nia liman fuan parte loos no mós tebe dala ida iha lezada nia kabaas rezulta lezada monu tun ba rai. Bazeia ba faktu provadu sira ne'e no tetu mós ho sirkunstánsia atenuante hot-hotu nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

## **7. Krime ofensa ba integridade fíziku simples**

Nú. Prosesu

: 0046/21.CVSLL

Kompozisaun Tribunál : Singulár  
Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Jonas Henrique da Costa  
Desizaun : Pena prizaun fulan 6 suspende ba tinan 1 indemnizasaun sivil US\$120.00.

Iha 16 Outubru 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ne'ebé envolve arguidu Melquilius de Jesus Moniz hasoru lezadu Marcelo Ximenes, iha Munisípiu Covalima.

### **Akuzasaun Prokuradór**

Prokuradór akuza katak Iha 30 Dezembru 2021, iha oras tuku 22:30 kalan, arguidu foti fatuk tuku dala ida iha lezadu niaibun rezulta kanek no raan. Antes agresau ne'e, arguidu ho lezadu diskute malu kona-ba lezadu duni arguidu nia karau, nune'e arguidu nerboju no komete aktu ne'e hasoru lezadu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

### **Produsaun ba prova sira**

Antes tama ba produsaun ba prova tribunál bazeia ba artigu 262 KPP halo tentativa konsiliaun ba krime sira ho natureza semi publiku. Maibé iha tentativa konsiliaun ne'e lezadu lakohi dezisté nia kazu hasoru arguidu, nune'e kontinua ba julgamentu.

Iha prosesu julgamentu arguidu konfesa faktu hotu iha akuzasaun no deklarata katak arrepende nia hahalok, foin primeiravés mai hatan iha tribunál no promete sei la repete krime hanesan iha futuru hasoru lezadu no ema seluk.

Prokuradór no defeza husu ba tribunál atu presinde lezadu nia deklarasaun, tanba arguidu konfesa faktu hotu iha akuzasaun. Tribunál aseita ho pedidu ne'e hodi la rona tan dekarasaun lezadu nian.

### **Alegasaun finál**

Prokuradór konsidera arguidu provadu komete krime ofensa ba integridade fízika simples, tanba ne'e husu ba tribunál atu kondena arguidu tuir 145 KP.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa, arrepende nia hahalok no depoisde akontesimentu ne'e arguidu lahalo tan krime hasoru lezadu no foin mak mai hatan iha tribunál, tanba ne'e husu ba tribunál atu kondena arguidu ho pena adekuadu.

### **Desizaun**

Depoisde avalia faktu hotu, tribunál konsidera faktu hotu provadu. Bazeia ba faktu provadu hirak ne'e no tetu mós ho sirkusntánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

## **8. Krime krontra bandu**

Nú. Prosesu : 0026/22.CVSUI  
Kompozisaun Tribunál : Koletivu  
Juis : Dr. Samuel Paicheco Dr. Nasson M. A. M. Doutel no Dr.  
Ivan J. S. Antonino. Gonçalves  
Prokuradór : Dr. Rafael jeronimo Gusmao  
Defeza : Dr. Jonas Henrique da Costa  
Desizaun : Pena multa

Iha 16 Outubru 2023, Tribunál Judisiál Primeira Instánsia Suai prezide leitura akordaun ba krime kontra bandu ne'ebé envolve Arguidu João Amaral, Natalino Cardoso, Domingos Cardoso Ximenes dos Santos no Jonatan Sarmento Cardoso dos Santos hasoru Estadu RDTL, iha Aldeia Wala, Suku Beiseuk, Postu Tilomar, Munisípiu Covalima.

### **Akuzasaun Prokuradór**

Prokuradór akuza katak iha 05 Marsu 2022, iha oras tuku 22:30 kalan, arguidu sira kontaktu sidadaun Indonézia ho naran Sr. Goris halo kontratu atu sosa arguidu sira nia nuu maran no kami'i, hafoin arguidu sira lori sira nia nuu maran karon 6 hamutuk 142 kilo, kami'i saku ida 27 kilo, nuu maran kada kilo ida faan ba 0,60 sentavus no hetan US\$85,20 no kami'i kilo ida faan ba US\$1,15 no hetan US\$31.05. Nuu maran no kami'i faan iha 06 Marsu 2022, iha oras tuku 01:30 kalan, arguidu sira atu tama fali mai teritóriu Timor-Leste mak UPF detein no pasa revista mak detekta arguidu sira hatama nuu maran no kami'i ba Indonézia liuhusi dalan ilegal.

Prokuradór akuza arguidu kontra artigu 316 KP kona-ba kontra bandu ho moldura penál tinan 2 too tinan 6 ka multa.

### **Produsaun ba prova sira**

Iha prosesu julgamentu, arguidu sira konfesa totalmente ba faktu hotu iha akuzasaun, foin primeiravés mai hatan iha tribuná, arguidu sira mós deklara katak halo atividade ida ne'e tanba nesesidade uma laran mak obriga arguidu sira, arrepende sira ninia hahalok no promete iha futuru sei la hatama tan sasan liuhusi dalan ilegal.

### **Alegasaun finál**

Prokuradór haktuir katak arguidu sira provadu komete krime kontra bandu, bazeia ba konfisaun arguidu sira nian, prokuradór mós hare'e katak krime kontra bandu a'as tebes iha área fronteira, nune'e atu halo prevensaun ba krime refere husu ba tribunál atu kondena arguidu sira tuir artigu 316 KP.

Entretantu defeza haktuir katak, iha julgamentu arguidu sira konfesa no arrepende ona sira ninia hahalok no depoisde akontesimentu ne'e arguidu sira la hasai ona sasan liuhusi dalan ilegal no arguidu sira mós mai hatan ona iha tribunál, tanba ne'e husu ba tribunál atu kondena arguidu sira ho pena multa.

### **Desizaun**

Depoisde avalia faktu sira hotu, tribunál konsidera faktu hotu provadu katak arguidu sira hasai sasan ilegal ba iha Indonézia. Bazeia ba faktu provadu hirak ne'e no tetu mós ho

sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena kada arguidu sira ho pena multa US\$45.00, ne'ebé kada arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

### **9. Krime aktu seksuál ho adolexente**

Nú. Prosesu : 0039/23.PDSUA  
Kompozisaun Tribunál : Singulár  
Juis : Dr. Naason M.A.M. Doutel  
Prokuradór : Dr. Rafael Jeronimo Gusmão  
Defeza : Dra. Tomazia Umbelina Magno ho Dr. Xisto Pedroso  
(Advogadu)  
Desizaun :Pena prizaun tinan 3 suspende ba tinan 5 indemnizasaun sivil US\$1.000.00

Iha 16 Outubru 2023, Tribunál Judisiál Primeira Instánsia Suai prezide leitura sentensa ba krime aktu seksuál ho adolexente ne'ebé envolve arguidu OB hasoru lezada, iha Munisípiu Covalima.

#### **Akuzasaun Prokuradór**

Prokuradór akuza katak iha 28 Jullu 2022, iha oras tuku 11:30 meiodia, arguidu ba iha lezada nia uma no tama ba iha lezada nia kuartu laran no husu ba lezada atu halo relasaun seksuál, lezada aseita nune'e arguidu hasai lezada nia roupa arguidu mós hasai nia roupa no halo relasaun seksuál ho lezada.

Tuir mai iha 30 Jullu 2022, iha oras tuku 12:00 kalan, arguidu kontaktu lezada atu hasoru malu iha lezada nia uma, bainhira arguidu too iha uma tama liu ba lezada nia kuartu laran hafoin arguidu ho lezada ida-idak hasai ninia roupa rasik no halo relasaun seksuál, hafoin halo tiha relasaun seksuál arguidu fila ba ninia uma.

Akontese datoluk, iha loron la apura maibé iha fulan Agostu 2022, iha oras tuku 22:00 kalan, arguidu nafatin tama ba lezada nia kuartu laran, arguidu ho lezada ida idak hasai nia roupa no halo relasaun seksuál, halo hotu arguidu mós fila ba nia uma.

Akontese dahaat, iha 06 Setembru 2022, iha oras tuku 2:00 madrugada, arguidu nafatin tama ba iha lezada nia kuartu laran, arguidu ho lezada idak idak hasai nia roupa no halo relasaun seksuál, halo hotu arguidu fila ba nia uma.

Prokuradór akuza arguidu kontra artigu 178 KP kona-ba aktu seksuál ho adolexente ho moldura penál tinan 5.

#### **Produsaun ba prova sira**

Iha julgamentu arguidu konfesa faktu iha akuzasaun katak balu loos no balu laloos, iha Agostu ne'e laloos, los mak iha fulan Setembru 2022, ne'e mak arguidu ho lezada halo duni relasaun seksuál no arguidu deklarata katak durante sira halo relasaun seksuál, lezada nia família sira nunca hatene, bainhira lezada isin rua fulan tolu mak lezada nia

inan aman sira foin hatene. Arguidu mós deklara katak hakarak atu hola lezada hanesan nia feen maibé iha momentu ne'ebá lezada nia família sira baku arguidu nune'e arguidu la kohi hakbesik lezada. Nune'e mós lezada antes atu partus kontaktu diak ho arguidu no partu hotu arguidu fulan-fulan sempre fó osan US\$50.00, ba iha labarik.

Aleide ne'e lezada kontinua konfirma faktu sira no deklara katak lezada koñese arguidu hanesan nia la'en no iha momentu ne'ebá mós arguidu hela hamutuk ho lezada sira, no iha momentu akontese primeiru, iha 28 fulan Jullu 2022 to'o iha 06 Setembru 2022, arguidu tama ba iha lezada nia kuartu laran bebeik ho kalan boot hodi halo relasaun seksuál ho lezada dala neen no ikus lezada atu fó hatene nia família sira maibé lezada tauk. Depois lezada hetan tiha oan arguidu nunca hakbesik ba iha lezada nia uma, dalaruma manda de'it mensagem ba lezada.

### **Alegasaun finál**

Prokuradór haktuir katak, arguidu provadu komete krime hasoru lezada arguidu konfesa faktu balun no konfirma mós husi lezada, arguidu hatene katak lezada foin idade tinan 14 ba 15 anos, maibé arguidu abuzu nia inesperensia seksuál ka lezada seidak dezenvolve nia responsabilidade seksuál nian, arguidu bosok dehan halo dala tolu de'it, prokuradór konsidera arguidu nia aktu ne'e priense elementu krime. Nune'e Prokuradór husu alterasaun substansiál husi alterasaun juridika husi faktu segundu ba lei nuação 33-36 nuação 3º LKVD tanbá eis konjuje, nune'e husu ba tribunál atu aplika pena prizaun tinan 8 ba arguidu.

Entretantu defeza hatuir katak, arguidu konfesa parsialmente ba faktu ne'e katak arguidu hakarak duni lezada atu hola nia maibé iha momentu ne'ebá lezada nia família atu baku arguidu mak arguidu hases an husi lezada nune'e mós husi parte lezada deklara katak koñese arguidu hanesan nia la'en no arguidu fulan-fulan sempre fó hela osan ba labarik, defeza hare'e katak krime ne'ebé inputa ba arguidu ne'e la priense elementu krime nian tanba ne'e husu ba tribunál atu absolve arguidu husi krime ne'e.

### **Desizaun**

Depoisdé avalia faktu sira hotu, tribunál konsidera faktu hotu provadu, bazeia ba faktu provadu sira ne'e no tetu mós ho sirkunstánsia hot-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan 5 no selu indemnizasaun sivi ba lezadal US\$1.000.00.

### **10. Kazu sivil regulasaun ezersísiu podér paternál**

Nú. Prosesu	: 0038/23.CVTDS
Kompozisaun Tribunál	: Singulár
Juis	: Dr. Ivan José Suritay Patrocínio Antonino
Prokuradór	: Dr. Rafael Jeronimo Gusmão
Defeza	: Dr. Jonas Henrique da Costa
Desizaun	: Omologa pedidu dezisténsia keixa

Iha 20 Outubru 2023, Tribunál Judisiál Primeira Instánsia Suai prezide tentativa konsiliaun ba kazu regulasaun ezersísiu podér paternál ne'ebé envolve autór AJG fulan 11 hasoru rekeridu/a QG no ESJM, iha Munisípiu Covalima.

### **Termu no fundamentu sira**

Iha loron no fulan ne'ebé la apura, maibé iha tinan 2022, rekeridu sai husi uma tanba deskonfia rekerida amante ( *selingkuh*) ho mane seluk, rekeridu abandona sira nia oan no la fó alimentasaun, nune'e prokuradór representa menór hatama asaun ida ne'e, hodi nune'e rekeridu atu tau matan ba menór ninia nesesidade lor-loron nian.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

### **Tentativa konsiliaun**

Iha tentativa konsiliaun ne'e, rekeridu no rekerida konkorda menór nafatin hela ho rekerida no rekeridu sei ba vízita menór semana ida dala rua iha loron Sabdu no Domingu no bele ba foti no lori menór sira lao halimar depois lori fila fali ba rekerida. Alende ne'e rekeridu mós konkorda katak kada fulan sei fó alimentasaun US\$35.00 ba sira nia. Komesa husi fulan Novembru 2023, rekeridu sei transfere osan ho montante iha leten liuhusi rekerida nia konta bankaria.

### **Alegasaun finál**

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

### **Desizaun**

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

## **11. Krime ofensa ba integridade fízika simples ho natueza violénsia doméstika no ofensa ba integridade fízika simples**

Nú.Prosesu	: 0052/23.PDSUA
KompozisaunTribunál	: Singulár
Juis	: Dr. Samuel da Costa Pacheco
Prokuradór	: Dr. Rafael Jeronimo Gusmão
Defeza	: Dr. Jonas Henrique da Costa
Desizaun	: Omologa pedidu dezisténsia keixa no pena prizaun fulan 3 suspende ba tinan 1

Iha 24 Outubru 2023, Tribunál Judisiál Primeira Instánsia Suai prezide tentativa konsiliaun no leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SNZC hasoru nia feen EdJX no nia feton lezada MdS, iha Munisípiu Covalima.

### **Akuzasaun prokuradór**

Prokuradór akuza katak Iha 13 Maiu 2023, iha oras tuku 17:30 lokraik, arguidu buti lezada EDJX nia kakorok riba lezada ba rai no nafatin buti metin lezada nia kakorok, arguidu nia aktu ne'e rezulta lezada sente moras maka'as iha lezada nia kakorok, nune'e lezada tata arguidu nia liman no arguidu husik tiha lezada. Arguidu kontinua foti

ai-suak iha dapur hakat ba lezada atu baku lezada, maibé lezada MdS hafahe tiha arguidu ho lezada no ai-suak nia tutun kona iha lezada MdS nia matan fukun rezulta kanek no raan sai. Antes agresaun ne'e, arguidu ho lezada EDJX diskute malu kona-ba arguidu haruka lezada atu ba tesi duut fó karau han maibé lezada lakohi, nune'e mosu agresaun ne'e.

Prokurdador akuza arguidu kontra artigu 145 KP kona-ba ofensa ba integridade física simples ho moldura penal too tinan 3 ka multa konjuga ho artigu 2, 3(a),35 (b) no 36 LKVD.

### **Produsaun ba prova sira**

Antes tama ba produsaun ba prova bazeia ba artigu 262 KPP Nú 2, tribunál halo tentativa konsiliaun ba krime ofensa ba integridade física simples ne'ebé arguidu komete hasoru lezada MDS.

Iha tentativa konsiliaun ne'e lezada MDS hakarak deziste nia keixa hasoru arguidu tanba antes ne'e sira dame malu ona.

Prokurador no defeza husu ba tribunál atu omologa pedidu dezistencia keixa ne'e, nune'e tribunál omologa prosesu ne'e no absolve arguidu husi krime ne'e no kontinua ba julgamentu kazu ofensa ba integridade física simples ho natureza violénsia doméstika hasoru lezada EDJX.

Iha prosesu julgamentu arguidu konfesa totalmente ba faktu sira iha akuzasaun, arguidu deklarata katak arrepende nia hahalok, foin primeiravés mai hatan iha tribunál no promete sei la komete tan krime hanesan hasoru lezada no ema seluk iha futuro. Tanba arguidu konfesa nune'e tribunál presinde tiha lezada nia deklarasaun.

### **Alegasaun finál**

Prokurador, haktuir katak arguidu provadu komete krime hasoru lezada ne'ebé nu'udar arguidu nia feen, arguidu mós hatene katak baku feen ne'e ladi'ak maibé nia baku nia feen. Tanba ne'e husu ba tribunál atu kondena arguidu ho pena ne'ebé adekuadu.

Entretantu, defeza haktuir katak iha julgamentu arguidu konfesa, arrepende nia hahalok no promete katak sei la baku nia feen, nune'e husu ba tribunál atu kondena arguidu ho pena multa.

### **Desizaun**

Depoisde avalia faktu sira, tribunál prova katak arguidu buti lezada nia kakorok riba lezada ba rai no nafatin buti metin lezada nia kakorok, arguidu nia aktu ne'e rezulta lezada sente moras maka'as iha lezada nia kakorok, nune'e lezada tata arguidu nia liman no arguidu husik tiha lezada. Arguidu kontinua ba foti ai-suak iha dapur hakat ba lezada atu baku lezada, maibé lezada MdS hafahe tiha arguidu ho lezada.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan hasoru lezada ka ema seluk iha futuro. Ho nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

## **12. Krime ofensa ba integridade fízika simples ho natureza violéncia doméstika.**

Nú. Prosesu : 0013/23.CVSUI  
KompozisaunTribunál : Singulár  
Juis : Dr. Samuel da Costa Pacheco  
Prokuradór : Dr. Rafael Jeronimo Gusmão  
Defeza : Dr. Domingos dos Santos  
Desizaun : Pena prizaun fulan 6 suspende ba tinan 1

Iha 24 Outubru 2023, Tribunál Judisiál Primeira Instáncia Suai prezide julgamentu leitura sentensa ba krime ofensa ba integridade fízika simples ho natureza violéncia doméstika ne'ebé envolve arguidu FW hasoru nia feen, iha Munisípiu Covalima.

### **Akuzasaun Prokuradór**

Prokuradór akuza katak Iha 26 Janeiru 2023, iha oras tuku 13:00 lokraik, arguidu kaer lezada nia fuuk rasta maka'as dala tolu atu riba lezada ba rai, maibé la konsege, lezada hikis aan atu ba subar maibé arguidu duni tuir no kaer lezada nia kaba'as no riba lezada ba rai no tuku dala iha lezada nia ulun. Antes agresaun ne'e, arguidu ho lezada diskute malu kona-ba lezada soe piadas, nune'e mosu agresaun ne'e. Kazu ne'e aneksu ho relatori médiku husi PRADET no fotografia husi PNTL.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál too tinan 3 ka multa konjuga ho artigu 2, 3(a), 35 (b) no 36 LKVD.

### **Produsaun ba prova sira**

Iha prosesu julgamentu, arguidu konfesa faktu hotu iha akuzasaun no deklarata katak baku feen ne'e ladi'ak no promete iha futuru sei la repete ninia hahalok ne'e hasoru lezada, foin primeiravés mai hatan iha tribunál, arrepende nia hahalok. Tanba arguidu konfesa faktu hotu iha akuzasaun, nune'e tribunál presinde lezada nia deklarasaun .

### **Alegasaun finál**

Prokuradór haktuir katak, arguidu provadu komete krime hasoru lezada, bazeia ba konfisaun arguidu nian, mezmu sira di'ak malu ona maibé atu halo prevensaun ba krime violéncia doméstika ne'ebé a'as tebes, husu ba tribunál atu kondena arguidu ho pena pena prizaun, maibé suspede ninia ezekusaun.

Entretantu defeza haktuir katak, arguidu konfesa, arrepende nia hahalok no depoisde akontesimentu ne'e arguidu la halo tan krime hasoru lezada, alende ne'e arguidu mós iha ekonomia suficiente, tanba ne'e husu ba tribunál atu kondena arguidu ho pena multa.

### **Desizaun**

Depoisde avalia faktu sira hotu, tribunál prova katak arguidu kaer lezada nia fuuk rasta maka'as dala tolu atu riba lezada ba rai, maibé la konsege, lezada hikis aan atu ba subar maibé arguidu duni tuir no kaer lezada nia kaba'as no riba lezada ba rai no tuku dala iha lezada nia ulun.



Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál, no depoisde akotesimentu to'o agora arguidu la baku ona lezada, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

### **13. Krime ofensa integridade fiziku simples ho natureza violénsia doméstika**

Nú. Prosesu : 0012/23 CVMCT  
Kompozisaun Tribunál : Singulár  
Juis : Dr. Samuel da Costa Pacheco  
Prokudadór : Dr. Rafael Jeronimo Gusmao  
Defeza : Dr. Domingos dos Santos  
Desizaun : Pena prizaun fulan 6 suspende tinan 1

Iha 24 Outubru 2023, Tribunál Judisiál Primeira Instánsia Suai, prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu EMAB hasoru nia feen, iha Munisípiu Covalima.

#### **Akuzasaun Prokuradór**

Prokuradór akuza katak iha 25 Maiu 2023, iha oras tuku 17:20 lokraik, arguidu tebe dala ida iha lezada nia kidan parte karuk, tuku dala ida iha lezada nia kotuk laran no foti ai-kabelak baku dala ida iha lezada nia kidan parte karuk no mós baku dala ida iha lezada nia liman kabun parte loos rezulta lezada monu tun ba rai no arguidu kontinua baku dala ida iha lezada nia liman kabun parte loos. Antes agresaun ne'e, arguidu ho lezada diskute malu kona-ba lezada tolok arguidu nia inan, nune'e mosu agresaun ne'e.

Prokurdadór akuza arguidu kontra artigu 145 KP kona-ba krime ofensa ba integridade física simples ho moldura penál too tinan 3 ka multa konjuga ho artigu 2, 3(a), 35 (b) no 36 LKVD.

#### **Produsaun ba prova sira**

Iha prosesu julgamentu, arguidu konfesa totalmente ba faktu sira iha akuzasaun no arguidu daklara katak foin primeiravés mai hatan iha tribunál no promete sei la repete hahalok ne'e iha futuru, arguidu mós daklara katak depois akotesimentu too agora la baku tan lezada.

Prokudadór no defeza husu ba tribunál presinde lezada nia deklarasaun tanba arguidu konfesa totalmente faktus iha akuzasaun, tribunál konkorda ho pedidu hodi la rona tan deklarasaun lezada nian.

#### **Alegasaun finál**

Prokudadór haktuir katak arguidu provadu komete krime ofensa ba integridade física simples ho natureza violénsia doméstika hasoru lezada, bazeia ba konfisaun arguidu nian, tanba ne'e husu ba tribunál atu kondena arguidu ho pena adekuadu.

Entretantu defeza haktuir katak, iha julgamentu arguidu arrepende ona nia hahalok no depoisde akotesimentu ne'e arguidu sei la halo tan no foin mak mai hatan iha tribunál, tanba ne'e husu ba tribunál atu kondena arguidu, ho pena multa.

#### **Desizaun**

Depoisde avalia faktu sira hotu, tribunál prova katak arguidu tebe dala ida iha lezada nia kidan parte karuk, tuku dala ida iha lezada nia kotuk laran no foti ai-kabelak baku dala ida iha lezada nia kidan parte karuk no mós baku dala ida iha lezada nia liman kabun parte loos rezulta lezada monu tun ba rai no arguidu kontinua baku dala ida iha lezada nia liman kabun parte loos.

Bazeia ba faktu provadu sira no tetu mós ho sirkunstánsia atenuante sira hanesan arguidu konfesa, foin primeiravés mai hatan iha tribunál no promete sei la repete hikas hahalok ne'e iha futuro no diak malu ona ho lezada, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

#### **14. Krime ofensa ba integridade fizika simples ho natureza violénsia doméstika**

Nú.Prosesu	: 0018/22.BBBBV
KompozisaunTribunál	: Singulár
Juis	: Dr. Hugo da Cruz Pui
Prokuradór	: Dr. Rafael Jeronimo Gusmão
Defeza	: Dr. Albano Maia (Advogadu Privadu)
Desizaun	: Pena multa US\$ 60.00

Iha 25 Outubru 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu NSV hasoru nia feen, iha Munisípiu Bobonaro.

#### **Akuzasaun Prokuradór**

Prokuradór akuza katak Iha 17 Novembru 2022, iha oras tuku 01:30 madrugada, arguidu tebe dala ida iha lezada nia kotuk laran, tuku dala ida iha lezada nia matan parte loos no tuku dala ida iha reen-toos. Antes agresaun ne'e, arguidu ho lezada diskute malu kona-ba bainhira arguidu toba dukur hela iha kuartu sorin lezada ho sira nia oan toba iha kuartu sorin arguidu rona sira nia oan tanis, nune'e arguidu ba husi tuir no mosu agresaun ne'e.

Prokurdadór akuza arguidu kontra artigu 145 KP kona-ba krime ofensa ba integridade fizika simples ho moldura penál too tinan 3 ka multa konjuga ho artigu 2,3(a), 35 (b) no 36 LKVD.

#### **Produsaun ba prova sira**

Iha prosesu julgamentu, arguidu konfesa totálmente ba faktu sira iha akuzasaun no deklara katak arrepende ona nia hahalok katak baku feen ne'e ladi'ak foin mak mai hatan iha tribunál no promete iha futuro sei la komete tan krime hasoru lezada, arguidu mós deklara tan katak depoisde akontesimentu too agora la komete tan krime seluk.

Prokudadór no defeza husu ba tribunál presinde lezada nia deklarasaun tanba arguidu konfesa totalmente faktus iha akuzasaun, tribunál konkorda ho pedidu hodi la rona tan deklarasaun lezada nian.

## **Alegasaun finál**

Prokuradór haktuir katak, arguidu provadu komete krime hasoru lezada, bazeia ba konfisaun arguidu nian, mezmú sira di'ak malu ona maibé husu ba tribunál atu kondena arguidu tuir artigu 145 KP.

Entretantu defeza haktuir katak arguidu konfesa integralmente ba faktú iha akuzasaun no depoisde akontesimentu la iha problema seluk no arguidu mós foin mak mai hatan iha tribunál, tanba ne'e husu ba tribunál tetu sirkunstásia hotu antes kondena arguidu.

## **Desizaun**

Depoisde avalia faktú sira hotu, tribunál prova katak arguidu tebe dala ida iha lezada nia kotuk laran, tuku dala ida iha lezada nia matan parte loos no tuku dala ida iha reen-toos.

Bazeia ba faktú provadu sira ne'e tetu mós ho sirkunstásia hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$ 60.00, ne'ebé arguidu sei selu 0,50 sentavus kada loron durante loron 120. Tribunál mós fiksa pena alternativa durante loron 80 prizaun, banhira arguidu la selu pena multa refere.

## **15. Krime ofensa ba integridade fizika simples ho natureza violénsia doméstika**

Nú.Prosesu : 0011/22.CVMCT  
KompozisaunTribunál : Singulár  
Juis : Dr. Hugo da Cruz Pui  
Prokuradór : Dr. Rafael Jeronimo Gusmão  
Defeza : Dr. Jonas Henrique da Costa  
Desizaun : Pena multa US\$45.00

Iha 25 Outubru 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JA hasoru nia feen, iha Munisípiu Covalima.

## **Akuzasaun prokuradór**

Prokuradór akuza katak iha 04 Juñu 2022, iha oras tuku 10:00 dadeer, arguidu basa dala ida iha lezada nia hasan parte karuk, tuku dala barak iha lezada nia kotuk laran la konsege sura. Antes agresaun ne'e, arguidu ho lezada diskute malu kona-ba arguidu ba deve ema nia osan no osan nain mai husu ninia osan iha arguidu, ho nune'e mosu agresaun ne'e.

Prokuradór akuza arguidu kontra artigu 145 KP kona-ba krime ofensa ba integridade fizika simples ho moldura penál too tinan 3 ka multa konjuga ho artigu 2, 3(a), 35 (b) no 36 LKVD.

## **Produsaun ba prova sira**

Iha julgamentu, arguidu deklara katak faktu iha akuzasaun ne'e loos hotu kedas, arrepende ninia hahalok, foin mak mai hatan iha tribunál, di'ak malu fali ona ho lezada no depoisde akontese too agora labaku ona lezada.

Prokudadór no defeza husu ba tribunál presinde lezada nia deklarasaun tanba arguidu konfesa totalmente faktus iha akuzasaun, tribunál konkorda ho pedidu hodi la rona tan deklarasaun lezada nian.

### **Alegasaun finál**

Prokuradór haktuir katak arguidu provadu komete krime hasoru lezada, bazeia ba konfisaun arguidu nian, mezmu sira di'ak malu ona maibé atu prevene krime violénsia doméstika ne'ebé a'as tebes, husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál aplika pena multa ho konsiderasaun katak arguidu konfesa, arrepende nia hahalok, foin mak mai hatan iha tribunál no depoisde akontesimentu di'ak malu ona ho lezada no to'o agora arguidu la repete tan ninia hahalok.

### **Desizaun**

Depoisde avalia faktu sira hotu, tribunál prova katak arguidu basa dala ida iha lezada nia hasan parte karuk, tuku dala barak iha lezada nia kotuk laran la konsege sura.

Bazeia ba faktu provadu sira ne'e no tetu mós sirkunstánsia hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$ 45.00, kada loronarguidu sei selu 0,50 sentavus, durante loron 90. Tribunál mós fiksa prizaun alternativa loron 60 prizaun, bainhira arguidu la kumpri pena multa refere.

### **Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>